



Број/Број: 03-/4-50-1-10-3-10/07
Сарајево/Сарајево: 4. 6. 2007. године

ZAPISNIK

3. sjednice Zajedničke komisije za evropske integracije Parlamentarne skupštine BiH, održane 31. 5. 2007. godine

Sjednica je počela u 11 sati.

Sjednicom je predsjedavao Halid Genjac, predsjedavajući Zajedničke komisije za evropske integracije.

Sjednici su prisustvovali članovi Zajedničke komisije: Halid Genjac, Drago Ljubičić, Alma Čolo, Ivo Miro Jović, Zoran Koprivica, Šemsudin Mehmedović, Branko Dokić, Selim Bešliagić, Milica Marković, Vladana Lučić, stručni saradnik u Komisiji, i Sabina Pstrocki, pripravnik-volonter. Članovi Azra Hadžiahmetović, Rudo Vidović i Hilmo Neimarlija opravdano su odsustvovali.

Osim članova Komisije, sjednici su prisustvovali: Igor Davidović, glavni pregovarač BiH u pregovorima s Evropskom unijom; Nedžad Hadžimusić, ambasador u sjedištu Ministarstva vanjskih poslova BiH; Dragan Božanić, ambasador u sjedištu Ministarstva vanjskih poslova BiH i nacionalni koordinator za Pakt stabilnosti; članovi Misije OSCE-a u BiH – Program podrške Parlamentu: Doina Ghimici i Nina Šandrk, te predstavnici medija.

Nakon što je predsjedavajući konstatirao postojanje kvoruma, usvojen je sljedeći

DNEVNI RED

1. Usvajanje Zapisnika 2. sjednice Zajedničke komisije;
2. Informacija o aktivnostima Pregovaračkog tima BiH u pregovorima s Evropskom unijom;
3. Informacija predstavnika MVP-a o aktivnostima Pakta stabilnosti, s posebnim osvrtom na njegovu reorganizaciju i transformaciju;
4. Priprema za 9. međuparlamentarni sastanak Zajedničke komisije s Komisijom Evropskog parlamenta za Jugoistočnu Evropu, Brisel, 28. juni 2007., utvrđivanje sastava delegacije i informacija o toku priprema za sastanak;
5. Tekuća pitanja.

Ad. 1. Usvajanje Zapisnika 2. sjednice Zajedničke komisije za evropske integracije PSBiH

Komisija je jednoglasno usvojila Zapisnik 2. sjednice.

Ad. 2. Informacija o aktivnostima Pregovaračkog tima BiH u pregovorima s Evropskom unijom

Na početku svog izlaganja, Igor Davidović, glavni pregovarač u pregovorima BiH s Evropskom unijom, zahvalio je Komisiji koja je dala podršku Pregovaračkom timu ističući da će ona imati značajnu ulogu prilikom ratifikacije ugovora.

On je naglasio da su pregovori, koji su ubrzani na izričito insistiranje Brisela, formalno okončani. Do sada su održane dvije zvanične i pet tehničkih rundi pregovora, kako je bilo i predviđeno. Da bi se pregovori okončali, međutim, potrebno je ispuniti političke uslove, koji su neophodni za održavanje treće zvanične runde pregovora.

To je posljednja runda pregovora koja bi označila i formalno zaključenje procesa, tj. potpisivanje Sporazuma o stabilizaciji i pridruživanju (SSP). Potpisivanje ovog sporazuma označit će političku, demokratsku i zakonodavnu pripremljenost BiH za dobivanje statusa pridruženog člana EU. To podrazumijeva da će BiH i formalno biti pripremljena za preuzimanje i provođenje standarda EU, koji su preduslov za početak pregovora o punopravnom članstvu. Tekst Sporazuma o stabilizaciji i pridruživanju usaglašen je i dogovoren je tranzicijski period od šest godina, odnosno okvirni vremenski rok u kojem BiH treba ispuniti obaveze preuzete od EU. Uslovi za parafiranje, tj. zvanično usaglašavanje Sporazuma podrazumijevaju rješavanje političkih pitanja, kao što je reforma policije, i evropska zajednica neće praviti ustupke kada je u pitanju njihovo ispunjenje. U tom procesu važna je i uloga Parlamentarne skupštine BiH. Samo parafiranje Sporazuma, kao i potpisivanje može biti obavljeno u jednom danu, a potpisnici će biti pregovarač iz BiH i izaslanik Evropske unije. Nakon potpisivanja Sporazuma slijedi ratifikacija zemalja članica EU koja u prosjeku traje oko dvije godine i u kojoj će ključnu ulogu imati bh. diplomatska mreža.

U diskusiji nakon izlaganja glavnog pregovarača Igora Davidovića, Halid Genjac zahvalio je glavnom pregovaraču i njegovom timu na uspješnom vođenju pregovora s EU. Predsjedavajući Komisije je, u vezi s izlaganjem glavnog pregovarača, govorio o značaju zaštite domaćih proizvoda i prilagođavanju carinskog sistema budućim evropskim standardima.

Šemsudin Mehmedović istakao je značaj edukacije privrednika i pitao da li će privrednici i poljoprivredni proizvođači biti spremni ući u ovaj proces, konstatirajući da za bh. izvoznike uvijek postoje nove barijere za izvoz u susjedne države.

Ivo Miro Jović pozdravio je izlaganje Igora Davidovića i predložio da elektronski mediji prate rad Pregovaračkog tima BiH i o tome redovno obavještavaju javnost, tražeći da se utvrdi koje bh. institucije nisu ispunile preuzeti dio obaveza, a koje se odnose na proces ispunjavanja obaveza prema EU. Istakao je da treba poboljšati efikasno iskorištavanje budžeta s obzirom da su statistike za prošlu godinu pokazale kako je budžet bio nedovoljno iskorišten, što je najvjerovatnije rezultiralo lošijom podrškom kako za ispunjavanje pretpripravnih obaveza BiH, tako i za provođenje reformi, privrednih i drugih, koje moraju prethoditi potpisivanju SSP-a.

Branko Dokić čestitao je pregovaračkom timu na uspješno obavljenom zadatku i, osvrćući se na reformu policije, rekao je da je to uslov koji se postavlja u BiH, a ne u Briselu

dodajući da nijedna politička stranka u Republici Srpskoj nije spremna prihvatiti reformu u trenutnoj formi. Također je naglasio kako je potrebno da se javnost što je moguće više upozna sa svim aspektima pregovora i Sporazuma koji se smiju izlagati u javnosti ili prema institucijama. Istakao je da mediji treba da budu uključeni u promociju svih aktivnosti Pregovaračkog tima BiH.

Alma Čolo otvorila je temu usklađivanja bh. legislative s evropskom i istakla da svaki zakon, bilo da ga inicira Vijeće ministara BiH ili poslanici, treba biti dostavljen u parlamentarnu proceduru skupa s mišljenjem Direkcije za evropske integracije BiH kao i Pregovaračkog tima o usklađenosti sa zakonodavstvom EU. Također je postavila pitanje efikasnosti policije u cijeloj BiH, te naglasila da se bez reforme policije u oba entiteta ne može ići u proces pridruživanja.

Selim Bešliagić rekao je da Komisija mora sugerirati svim zainteresiranim stranama da primjenjuju sve ono što je uslov za pristupanje EU.

Zoran Koprivica podržao je prijedloge Branka Dokića i Ive Mire Jovića koji se odnose na edukaciju javnosti i privrednih subjekata u procesu evropskih integracija.

Halid Genjac podsjetio je da je na današnjem dnevnom redu tehnička dimenzija pregovora, a da će se o političkim kriterijima razgovarati naknadno.

Nakon rasprave, a na prijedlog predsjedavajućeg, usvojeni su sljedeći zaključci:

1. Članovi Komisije prihvataju izlaganje glavnog pregovarača, pozdravljajući ostvarene rezultate.
2. Članovi Komisije podržavaju namjeru Pregovaračkog tima BiH da dijelove Sporazuma dostavi nadležnim institucijama na koje se odnose i gdje je to moguće.
3. Na jednoj od narednih sjednica Komisije razmatrat će se spremnost institucija i njihova pripremljenost za tranzicijski period.

Ad. 3. Informacija MVP-a BiH o aktivnostima Pakta stabilnosti, s posebnim osvrtom na njegovu reorganizaciju i transformaciju

Predstavnici MVP-a BiH, ambasadori u sjedištu, Nedžad Hadžimusić i Dragan Božanić, prezentirali su informaciju o Regionalnom vijeću za saradnju (RCC) dajući pregled aktivnosti vođenih tokom realizacije projekta kandidature Sarajeva za sjedište Sekretarijata Regionalnog vijeća za saradnju. Ambasador Hadžimusić izrazio je zahvalnost Zajedničkoj komisiji i nazvao je partnerom i supervizorom u procesu evropskog integriranja BiH. Fokusirao se na osnivanje, osnovne funkcije i aktivnosti Regionalnog vijeća za saradnju (RCC), koje je nastalo procesom transformacije Pakta stabilnosti za Jugoistočnu Evropu. Umjesto Pakta stabilnosti koji je lansiran i djelovao kao projekat Evropske unije, Regionalno vijeće za saradnju djelovat će pod političkim okriljem zemalja regiona II Evrope, organiziranih u Proces za saradnju u Jugoistočnoj Evropi (SEECF). Osim zemalja regiona, učesnica SEECF-a, RCC će okupljati partnerske i donatorske zemlje koje su bile uključene u aktivnosti Pakta stabilnosti čime će se ostvariti njegov kontinuitet. RCC će djelovati u punoj koordinaciji s trojkom SEECF-a (sadašnji, bivši i budući predsjedavajući SEECF-a).

Na sastancima regionalnih stolova Pakta stabilnosti u Beogradu i Bukureštu inicirano je uspostavljanje RCC, transformacijom Pakta stabilnosti, nakon čega je razrađen institucionalni okvir. Na samitu šefova država i vlada SEECF-a, u maju 2007., u Zagrebu, donesen je dokument (Aneks Povelji), kojim je definiran odnos RCC i SEECF-a i osnovni mehanizmi rada i odlučivanja.

Osnovna funkcija i zadaci RCC-a su: da se osigura politička koordinacija nad 25 regionalnih inicijativa koje su razvijene pod okriljem Pakta stabilnosti, razvijanje regionalne saradnje u Jugoistočnoj Evropi u različitim oblastima, s tim da zemlje regiona kao i sam region dostignu standarde za integriranje u evropske i evroatlantske strukture. Težište će biti na razvijanju regionalnih kapaciteta.

Nedžad Hadžimusić ponovio je da su prioriteti djelovanja RCC-a naslijeđeni i da predstavljaju kontinuitet djelovanja Pakta stabilnosti u oblastima ekonomije i društvenog razvoja, infrastrukture, pravosuđa, unutrašnjih poslova, međuparlamentarne i saradnje u oblasti sigurnosti, te kadrovske usavršavanja.

Dragan Božanić govorio je o uspješnoj kampanji, vođenoj tokom kandidature Sarajeva, za sjedište Sekretarijata. Kampanju je koordinirao MVP, uz podršku predsjedavajućeg i ostalih nadležnih u Vijeću ministara BiH. Kandidatura Sarajeva ocijenjena je pozitivnom i zvanično je potvrđeno da će Sarajevo, početkom 2008. godine, biti sjedište Sekretarijata novog regionalnog tijela – Regionalnog vijeća za saradnju. On je istakao da je prednost Sarajeva bila konsolidacija mira u poslijeratnom periodu, što je izuzetna politička poruka za građane BiH, susjede u regionu i međunarodno okruženje. Veoma je značajno da je Vijeće ministara BiH ustupilo Sekretarijatu funkcionalan prostor za rad, koji se nalazi u Zgradi prijateljstva BiH i Grčke, na 5. spratu.

Elaboriran je i Nacrt sporazuma kojim BiH daje Sekretarijatu RCC-a međunarodnopravni status sa značajnim privilegijama i imunitetskim pravima za generalnog sekretara i osoblje, koje takvim institucijama pripada prema važećim međunarodnim konvencijama. Istakao je da su utvrđeni i principi finansiranja Sekretarijata. Godišnji budžet od 3000000 eura finansirat će po jednom trećinom zemlje SEECIP-a, Evropske unije i partnerske zemlje. Bosna i Hercegovina učestvovat će sa 60 000 eura godišnje.

Poslije kraće diskusije koja je uslijedila nakon izlaganja predstavnika MVP-a, zaključeno je da Komisija prihvata izvještaj predstavnika MVP-a i pozdravlja osnivanje Regionalnog vijeća za saradnju čije će aktivnosti redovno pratiti.

Ad. 4. Priprema za 9. međuparlamentarni sastanak Zajedničke komisije s Komisijom Evropskog parlamenta za Jugoistočnu Evropu, Brisel, 28. juni 2007., utvrđivanje sastava delegacije i informacija o toku priprema za sastanak

Predsjedavajući Komisije Halid Genjac izvijestio je članove Komisije o toku priprema za održavanje 9. međuparlamentarnog sastanka Zajedničke komisije s Komisijom Evropskog parlamenta za Jugoistočnu Evropu, koji će biti održan u Briselu, 28. juna 2007.

Predloženo je da u delegaciji budu: Halid Genjac, Ivo Miro Jović, Šemsudin Mehmedović, Branko Dokić, Zoran Koprivica i Vladana Lučić, stručni saradnik u Komisiji. Komisija je jednoglasno usvojila predloženi sastav delegacije koja će učestvovati na sastanku u Briselu.

Ad. 5. Tekuća pitanja

Vladana Lučić, stručni saradnik u Komisiji, informirala je članove Komisije o održavanju seminara, koji će organizirati OSCE, a čiji su predstavnici pratili rad sjednice Komisije. Dogovoreno je s Doinom Ghimici, predstavnicom OSCE-a za podršku Parlamentu, da se 5. jula 2007. godine održi seminar za članove Zajedničke komisije za evropske integracije. Glavni izlagač na ovom seminaru bit će Anton Kokalj, predsjedavajući Komisije za evropske

poslove Parlamenta Slovenije, koji je prihvatio poziv da dođe u Sarajevo. Glavna tema njegovog izlaganja bit će rad Komisije, s posebnim osvrtom na parlamentarne obaveze koje se odnose na proces evropskog integriranja, kao i potrebe, izazove, strategiju i organizaciju rada Komisije. OSCE će na ovaj seminar pozvati i predstavnike Delegacije Evropske komisije za BiH.

Sjednica Komisije završena je u 14 sati.

Predsjedavajući
Zajedničke komisije
Halid Genjac